

鄱縣志卷十五

知縣事中江林愈蕃纂修

名宦志

漢詔云俗吏矯飾外貌安靜之吏悃悃無華竊謂
矯飾者希得名悃悃者務既實然賢不肖之間得
失懸絕縮綬者宜何處焉鄱自析置迄今宦此者
不乏人矣而政聲可紀僅若干人以是知名實之
未易言也夫奉職循理寧以弋譽然未有田疇子
弟悉以父母之心區處之而誰嗣不歌者患吾衷
弗篤耳覽斯志者尙繹樂只之詠崇惠義之真慎

鄱縣志

卷之十五

名宦志

毋以三代以上士不好名自寬哉

宋 九一人

桂如淵先任江華令嘉定四年始設縣調知縣事公披

榛礫撫瘡痍彌盜安民政務修飾一時良吏無出其

右

明 凡十三人

朱璣洪武初年任時縣初平庶務未舉公立科條謹區

畫暮年百度維新其才智有足多者

胡謨永樂四年任公勤廉惠賦役均平民用不擾有古

循吏風擢廣東僉事

李墳宣德元年任寬猛得宜政教兼舉時壇壝學校多廢圯公力修復之

沈迪正統六年任政尙廉明吏民畏服大新縣治煥然改觀

楊智初知宜都甚有政績正統十三年任本縣政尙寬簡民親愛之賢聲不減於宜都

韓暄天順四年任畱心民事賞罰均平學校橋梁多所修建廩貯穀粟預爲荒備涖任九載以憂去

裘叔登成化十八年任平直清廉修葺炎陵及學校規制視昔有加

蕓源成化二十二年任慈祥廉潔詢察民隱殷然如家人父子嘗自署有臥理優游與民樂居心嚴密有天知之聯蓋實錄云

易宗周嘉靖二年任修邑志得載筆體建炎陵聖容殿標勝表徵其才有足徵者

高祉嘉靖十四年任清節自勵未嘗妄取抑強扶弱輕徭薄賦百姓安之擢太僕丞去之日民扳號不忍釋

俞紹見名宦祠舊志載福建莆田人事實無攷吳仲見名宦祠舊志載江西進賢人事實無攷

吳世忠萬歷三十六年任潔己愛民著爲學須知以訓士講課無虛日壬子大水田畝漂沒力請於兵備鄧雲霄協請院藩奏蠲石碾沙壅永不成田糧若干石秩滿陞桂陽州守士民攀留不得爲立祠尸祝之莊大化天啓六年任秉性清介俸薪外未嘗取民間一錢火耗贖錢痛加革除獄訟據法定罪確不可易縣例日用薪米里役計日供送公獨按價市買囊橐不給或至朝爨弗繼泊如也六載考滿陞王府審理貧無以治裝敝篋破帳行色蕭然有寒士所不堪者士民斂十餘金以贈公力卻之有携一雞一蔬以獻者

鄱縣志

卷之十五

各官志

三

亦因辭不受留滯岳陽三載以家塾自給適來守岳者爲公鄉人稍資送歸里焉

任永欽崇正七年任下車軫念疾苦見鄱田畝起科數倍於他邑地瘠賦重民無以聊生著困窮圖說力爲籲請以紓民困適疾作未竟厥志而卒

國朝 凡七人

李朝事順治十五年任先是邑遭流寇蹂躪廬舍人民半被殘傷公下車加意撫綏招徠開闢城鄉漸臻富庶於是修葺學宮建大成門櫺星門彙纂邑志視其緩急次第舉行條理井然任凡十六載善政善教實

有足多云

俞曰都康熙二十五年任撫綏有方調劑得宜凡邑之
弊當革利當興者區畫殆盡公餘則進邑士談論道
德講求文藝百姓戴若父母任二載以內艱去士民
感其德請於

上祀名宦

黃文年康熙二十七年繼俞公任律身清廉聽訟明決
舉俞公之有志未逮者力成之暮年亦以內艱去士
民惜之

徐甫源康熙三十七年任軫念民瘼憂樂相關時邑納

鄆縣志

卷之十五

名宦志

四

戶苦於正賦未供又有里長科派之累田少者至倩
人認管圖免差徭公蒞任未久毅然以疾苦告大中
丞趙概行豁免自是舊弊盡絕鄆賴以安

張垚字峻公康熙四十九年任減耗羨絕苞苴葺黌宮
之頽除審丁之弊公庭閒靜政事修舉甫一載以疾
告休懷德者咸推為

盛世循良

張瑤字紫山康熙五十一年任廉潔愛士不襲虛聲於
署後西北隅建書院聚生童肄業延師訓課今更名
烈山書院是也邑舊有官田數十餘畝歷係官收租

以供薪水乃慨然以是田詳上請以其半爲館師俸
脯勒石垂久又以租銀不敷捐俸補湊月凡兩課優
待士類一時文風丕振院內賢侯祠以公爲首云
張浚雍正十年任具經濟才志期遠大下車伊始卽首
倡邑人士改建學宮振興文教聽訟洞悉隱微豪猾
歛跡賓興禮久不講公特屆期舉行遇旱宿齋維謹
躬率僚屬步詣城隍祠龍王廟虔禱廟前數武有潭
公每禱以石擊潭雨立至感龍神靈異置田祀之任
滿改調安福推陞內閣中書邑人士弗能忘置田聯
會每歲值公誕日必齊集禱祝焉

吳嗣正乾隆七年任制行正大立法嚴明甫下車卽首
治吏中之游閒豪猾者一境肅然却餽送絕情面案
無留牘尤好訓士捐俸造製文廟祭器修葺官廨自
題柱聯云國事如家事民情卽己情又置額於堂曰
政如農功蓋實錄也後調繁邵陽去之日士民遮道
祖餞至今稱之

師範

明 凡一人

張標崇止時教諭性剛直不阿繩弟子以禮法人有過
不憚面折士多畏服之建文昌閣於明倫堂之右列

房舍以待肄業者

國朝 凡六人

李光綸順治時教諭律已端嚴待士有道一秉禮法毫不阿徇兵火後學宮荆榛瓦礫請於邑令李朝事捐資設法朝夕勤瘁督建戟門兩廡修葺文廟明倫堂啟聖祠周圍垣墻手自種樹陞任

田宏恕康熙時訓導課士有法與生徒往來惟談道義無趨營勢利語邑中遇所親慶弔有以文匾請者非其人聞望素著卽厚禮堅求不輕與一字公序邑志

鄆縣志

卷之十五

名宦志

六

有却情面黜附會寧嚴無寬寧慎無濫數語實與公生平相表裏

彭之曇康熙時教諭律身端嚴訓士敦篤建天河書院以課士置田勸膏火復念諸生艱於資斧赴闈者稀諱請學院潘特加優助每課必先自作一藝遍示同人互相切劘詞賦詩歌多表微闡幽語關風教所著天河集炎陵志至今膾炙人口

盛有義雍正時教諭師範端嚴不徇時好才思明敏爲文獨標清秀諸生攻舉子業者多就東西廡肄業公一一指授不遺餘力東修厚薄非所計也時邑令張

浚改建學宮得公贊勳之力居多

余演乾隆九年教諭甫下車輒以振興文教鼓勵士行爲已任捐俸倡建本署大堂嚴立課程每月集多士面試之不以費輟恬淡寡營諸生來謁詩禮外言無他及閒時輒賦詩著述甚多以老致仕邑人士以失賢師爲惜云

舒而相乾隆十六年訓導溫厚和平道範可親而馭書門甚嚴從不假以詞色尤敦寅好宛若伯仲不以去留易情勤於誨人就正者甚多後卒於署生徒皆以義制服

鄆縣志

卷之十五

名宦志

七

主簿

以下四人俱係隨時添補故無倫次

段翰晉寧人元至正間爲鄆縣簿死於兵其子元誠抱翰勅牒至安仁殺賊有功

典史

沈朝蔭乾隆四年任居官廉謹無交結勢利習氣經理獄囚每存矜恤前令張方佳甚重其爲人任三載去職士民惜之

防汛

張文禮雍正四年由行伍任縣汛營伍謹飭兵民不擾境內肅然任滿推陞湖北興國營守備轉陞直隸大

定協遊擊祖餞者盈衢巷焉

知縣

王元臣江寧人康熙壬戌進士四十年任潔己愛民時
民樹藝之種公捐俸購茶桐栢竹榛栗桑麻之屬發
客總牌甲董率栽植又於每月朔二望六單騎減從
詣鄉宣講

上諭勸農問俗解組後士民思之置會田祝公生辰迄今
猶存

鄱縣志

卷之十五 名宦志

八